




*¶ Selectæ aliquot Legum, atque Ordinationum Academicarum particula, quas*  
*D. PROCANCELLARIUS, quò magis hoc seculo ad neglectum aut desuetudinem*  
*vergere videntur, eò impensius à singulis (pro suo cujusque loco atque officio)*  
*observandas proponit, in virtute juramenti, & sub pœna*  
*quæ incumbit transgressoribus.*

1.  Cholares omnes modestiam omnibus in locis colant: inferiores superioribus loco cedant, & debita reverentiâ prosequantur.
2. In Templo Scholisque nemo aufit sedilia conscendere; Nemo in publicis exercitiis indecorum strepitum edere, pedibus pulsando, pluteos cædendo, cachinnando, sibilando, insufurrando, aut indecenter excreando.
3. Dominicis Festisque diebus, dum conciones ante-meridianæ, pomeridianæque habentur in Ecclesia, B. Maria, nemo scholaris sub quocunque prætextu adeat conciones in aliis Templis.
4. In Templo B. Maria nemo infra gradum Magistrorum (nisi mensæ Sociorum Commensalis fuerit) intrare præsumat in aream Magistris destinatam, aut superiora ex utroque areæ latere sedilia occupare.
5. Nemo galero utatur, aut in Collegio, aut extra Collegium, exceptis Nobilibus aut Militum primogenitis. Graduati, cum pileis scholasticis, utantur etiam epitogiis: in publicis verò disputationibus, concionibus ad Clerum, supplicationibus, & congregationibus universis, habitu atque caputio (juxta solennem Academiae formulam) Regentes insigniantur.
6. A Congregationibus Magistri Regentes, & Non-regentes sese non absentent, præsentibus verò, nec discedant sine venia, nec disciplinam, gravitatēque tanti Senatūs, rixis, clamoribus, transcurfibus, conglomerationibus, aut subfelliis scansionibus violent. Bedelli congregationes in singulis Collegiis singulas convocent, atque in Collegiis ibi, ubi omnes commodè audire possint.
7. Sermo Latinus tantum audiatur tam in publicis conventibus scholisque, quam in mensis Collegiorum, & familiaribus colloquiis.
8. Lectores publici omnes statis diebus, horisque diligenter prælegant, auditores lectionem aliquam ejus Professionis, cui assignantur, nè omittant: Decani Collegiorum monitores septimanatim singulos singulis scholis Artium constituent: Monitores statim finitâ lectione, schedulam absentium, exeuntiumve (pro suo cujusque Collegio) alteri Bedellorum tradat sub pœna Statuti: Bedelli septimanatim deferant ad Procancellarium, sub virtute juramenti.
9. Inceptores, Baccalaurei, Quæstionistæ, Sophistæ omnes, Moderatores præcipuè, & Disputantes, ab omnibus invitationibus, commensationibus, & comotationibus, (tam publicis quam privatis) omnino abstineant, sub pœna suspensionis ad annum ab omni gradu suscepto, & suscipiendo.
10. Ad publicas Magistrorum disputationes, ut exeant è Collegiis, redeantque honesto comitatu stipati, Decani Collegiorum curent: Baccalaureorum atque Sophistarum ut intersit sufficiens numerus Procuratores videant.
11. In Disputationibus Magistrorum, Baccalaureorum, Sophistarum, nulla neque Oratio, neque quæstionum Explicatio, à quoquam, (Theologis, Juris-consultis, & Medicis exceptis) de Scripto legatur, sub pœna quinque solidorum, toties, quoties, inter Procuratores & Bedellos dividendum.
12. Nemo scholaris (publicis privatisque Officiariis exceptis) forum frequentet, vel diutius in plateis moram trahat, aut in tabernas, cauponas, diversoria, officinas pativendulorum, ædesve privatas (nisi justa de causâ per Procancellarium approbanda) sese immittat.
13. Omnes Sacris ordinibus initiati cujuscunque gradus aut facultatis in Academia fuerint, vestiantur modestè prout Clericos decet, specialiter collaria lintea in humeros indecenter expansa non habeant, nec cæsariem nimis promissam alant: Cæteri omnes scholares, tam graduati, quam non-graduati iis induantur vestibus, quæ nec superbiâ, nec sumptu luxuriant: Diploïdas nullâ parte fenestras gerant: Ocreati simul & togati, sive cothurnis candidisve tibialibus ornati nè incedant.
14. Nemo canes venaticos alat, nè bombardis utatur, aut retia tendat volatilibus.
15. In Festivitate Natalitiâ nemo cum lychnis, aut larvis, nè cum tubis, aut tympanis exeat è Collegio suo.
16. Nemo se intromittat in solennes Conventus (quos Sessiones aut Affizas vocant) aut in lustrationes armorum, aut in vicinas nundinas, nisi prius petita & obtenta veniâ à Procancellario, aut Præfecto Collegii in quo commoratur.
17. Quæstionistæ in Scholas à Patre producti, Prævaricatores etiam omnes, & Tripodes, & alii Disputantes, à mimicis gestulationibus, obscenitatibus, Anglicani sermonis ineptiis, dictariisque omnibus abstineant, sub pœna suspensionis, vel (si atrocitas facti postulaverit) expulsionis.
18. Portæ Collegiorum horis statutis claudantur: & nemo scholaris extra Collegium in privatis ædibus cujuscumque præsumat pernoctare.

JACO. FLETEVVOOD Procanc.

Novemb. 24. Anno Dom. 1663.